

欽定剿平三省邪匪方略

欽定剿平三省邪匪方略續編卷六

癸亥年

閏二月初四日

臣

惠齡奏言竊

臣

接據稟報賊

匪竄入棧西於十三日至鐵爐川甘省道員朱

爾漢遊擊七十九等率領兵勇趕到衝殺擊斃

賊匪十數人並擊傷賊目三人隨時投出被裹

難民四名又叅將李應元在林內搜殺賊匪三

人擒獲羅應九黃年二名該匪復奔站壩老林

適將軍興奎派遊擊劉英魁正在林內搜捕乘  
勢截擊戮斃賊匪十二人該匪由茶店子直趨  
大安寬川興奎聞信當卽派令都司德忠等連  
夜抄剿殺斃賊匪二十餘人擒獲矛手周克信  
等四名餘賊驚惶四散翻卦子山逃往川省南  
江境內臣卽飭令李應元帶兵追剿期與川省  
防兵兩相夾擊就近殲除將軍興奎現帶同總

兵國興阿遊擊興普在於卦子山一帶防範搜捕刻下寧陝東路尙有零匪未淨楊芳係該處本汛總兵自應令回寧陝搜捕臣亦向東路接

續前進仍入南山督率辦理聞撫臣祖之望現

駐漢中臣順道經過卽先將善後大端畧爲商

議至前起賊匪由南山竄越棧西時委員從九品朱調元在石門子殲斃賊匪四人擒獲賊目

汪元一名通判雒昂搜獲零匪四人驛丞黃綬  
搜殺零匪三人從九品黃仰曾搜殺零匪三人  
再查此次零匪直過棧道時適有西鄉縣訓導  
張建四川慶寧營千總馬良駉因差赴省連夜  
趨程猝遇賊至招呼寨民趕捕被賊匪用矛圍  
戮該員弁等身受多傷罵不絕口移時殞命奏

入

上命軍機大臣傳諭惠齡曰陝省棧西之賊前次惠齡奏到不及百人今又經官兵剿斃六十餘人是所剩不過數十人有何難辦惠齡未能剿淨仍紛紛竄往川境不足言功川省南江一帶地勢寬平較之陝省南山易施兵力且距額勒登保駐兵之處不遠今賊匪既經竄入川境斷不可復任折回又致闖入南山惠齡惟當一面飭令李應元與川

省官兵兩相夾擊就近知會經畧策應一面督飭  
各鎮將在於陝省邊界地方嚴密堵截以遏賊匪  
折竄之路並知會興奎協同防範倘再有賊匪竄  
回陝境必當治惠齡等之罪不能再邀寬貸矣其  
陝省東路零匪惠齡此時入山剿辦惟當趕緊辦  
淨俾陝省全就肅清不可延緩至此次零匪越過  
棧西時有西鄉縣訓導張建四川慶寧營千總馬

良驥行抵該處被賊戮傷身死該員弁中途遇賊  
猝被戮害殊堪憫惻著加恩照陣亡例賜卹

初七日

臣

德楞泰奏言竊

臣

兵次夔州接據副

都統銜色爾滾馬瑜稟報所有在大寧剿敗零  
匪竄入老林與另起零匪合夥共有二百餘人  
經副將馬元等追至三星廟殺賊七名又據副  
都統銜達斯呼爾岱副將羅聲皋稟報探聞黑



包山老林有匪匪十數名入山搜剿殺賊六名  
生擒八名滾巖一名此起全數掃盡又據總兵  
田朝貴稟報連日跟追零匪在太平天台山老  
林殲斃老教掌櫃田永祿偽先鋒楊勝祖及夥  
匪十三名生擒賊匪四十七名被擄難民二十  
一名當卽分別辦理所剩賊匪二百餘人鑽林  
分逃追至秋木坪接副都統銜富登阿副將王

兆菱等知會跟追過江苟逆餘匪前來隨分兵  
合剿兩面夾擊殺斃賊匪十二名生擒十三名  
又據該鎮稟報守備張應錫軍功苟文耀等在  
三溪子圍剿零匪殺賊三名活擒十五名同知  
銜候補通判劉星渠等在雨喬壩老林搜殺賊  
匪一名活擒十六名此起賊匪並無一名漏網  
獲犯內訊出僞元帥張順一犯當有貴州官兵

指爲戕害總兵施縉之賊衆兵懷恨痛哭研訊  
之下直認不諱田朝貴卽設施縉牌位率衆祭  
奠將張順轡割以慰忠魂又據遊擊陳弼稟報  
在開縣之雪泡山殺賊十二名生擒九名又據  
副都統銜富登阿遊擊楊森涂陞等稟報在開  
縣之水田壩殺賊九名擒獲十八名餘匪有走  
東鄉之勢查此起零匪卽係馬元等所追之賊

該員業已跟蹤追剿

臣

查各路所剿零匪狼狽

已極無不鑽林越箐朝東暮西聚則一二百名

散則數十名不等故各路所追之賊忽聚忽散

總無一定

臣

均已隨時飭催毋論何起均當遇

賊卽剿趕緊蒞事惟

臣

行至開縣據防堵巫山

邊界總兵張積稟報有賊匪一起約五六百

人由湖北巴東屬龍潭河竄向邱家灣一帶有

入川之勢當飭防堵叅將傅廷佐不必迎截只  
可尾追西來並派遊擊馬明德帶兵五百名前  
往策應詎該匪於十七日亥刻率眾攻撲傅廷  
佐營卡官 礮堵禦斃賊十數名直至黎明

馬明德帶兵趕到賊甫向西奔逃傅廷佐馬明  
德帶兵追躡張續帶兵在水口一帶扼截二十  
一日午刻傅廷佐馬明德等尾追至奉節之栗

子山殺賊十七名生擒黃之斌等六名又追至  
土門子突有伏賊衝出馬明德猝中矛傷陣亡  
弁兵亦有傷亡者該總兵在水口聞報卽飛往  
救援殺賊二十餘名生擒王登貴等十一名賊  
遂翻山折回東竄訊據獲犯供此起係青號劉  
渣鬍子爲首在老林內與黃白藍各號零星湊  
合共有六百多人向來總在巴東興山歸州一

帶山內今由界嶺過川卽在巫奉交界之板發  
埡一帶遊奕等情是日又據湖北總兵李天林  
稟報正月三十日跟剿劉渣鬍子等夥匪五百  
餘人在巴東之二塘埡賊分兩路前後撲營竭  
力擊退員弁兵勇均有傷亡該總兵身受矛傷  
副都統銜總管都當阿副將孫應奉業已帶兵  
前來併力跟剿等語查此起賊匪卽係現在張

績等所剿之賊自應速爲翦除方無餘燼復熾

之患臣當卽取道通城宵夜趨行向西前進旋

又據巫山文武稟報另有一起賊匪百餘人由

巴東之火峯界嶺西來與東折之賊合夥分爲

兩起一走十八溪三溪河一走鴛鴦池琴樂坪

均向東逃已近火峯界嶺等語查該匪等此時

東折合併亦不過七百餘人馬騾數十匹其中



奏合零匪固多而裒脅者詠亦不少臣現卽跟  
追入楚趕緊剿辦斷不令其深入

同日吳熊光奏言前由巴東二塘垓竄至歸州  
賊股經副將孫應奉等截擊西奔分股擾及州  
屬之周家灣一帶時值署宜昌府知府王樹勳  
率勇巡查寨堡探知賊蹤所在卽乘夜派令軍  
功寨勇前往襲剿焚賊六名擒獲活賊一名該

匪惶急西竄又遇副將孫應奉都司麻光裕等  
帶領兵勇追擊在八盤山斃賊六名擒獲二名  
匪衆遂由巴東羅壩等處狂奔出境折回巫山  
屬之木瓜溪玉水坪等處孫應奉等復追至川  
界截捕至北竄保康境內賊股東竄南漳該署  
縣楊于果會同遊擊雅金泰帶領兵勇鎗斃賊  
匪二人擒獲三名旋值呢瑪善等率兵趕擊又

殲斃十餘名生擒二十一名委員楊正邦典史  
楊秉和又督率寨勇殲斃九名寨勇劉傑徐朝  
貴杜正心劉起貴四名被害陣亡該匪遂向保  
康大竹坪宋家坪前竄呢瑪善追至宋家坪趕  
上賊匪後隊殲斃四名擒獲三名其前隊竄至  
大竹坪經吉林泰迎擊殲斃十四名擒獲二名  
該匪現竄西南金斗坪一帶訊據獲賊供稱此

股賊匪內有爲首之陳姓名陳雲共有三四百人今疊被殺殺尙剩二百數十人該匪仍欲逃

回川陝等語

臣

因飭孫應奉等暫紮川界并分

兵搜捕境內餘孽總兵慶溥一路官兵相離不

遠

臣

已飭該鎮相機兜截期與吉林泰呢瑪善

合力剿除

吳熊光又奏言查叛絕田產除隸在鄖陽各屬

及宜昌屬之興山歸州巴東施南屬之建始等  
縣者前經

奏明隨後查辦外其現在查出之叛絕田地山場  
基地散在蒲圻等二十六州縣中按縣查核多  
寡不齊肥磽異致其中田產較多之處應行安  
撫之鄉勇難民較少而鄉勇難民較多之處田  
產又復無多如以本境田產分給本境鄉勇難

民則囿於方隅或少或多各屬不能盡一辦理  
轉致偏枯然以此屬有餘之田產撥給別屬之  
鄉勇難民該民勇等移家就業相離各原籍或  
二三百里四五百里不等未獲受田之益先增  
遷徙之煩此而欲均平酌劑揆之民情事勢均  
有所難且查鄉勇雖多猶有征防名冊可考若  
難民散處各村鎮驟難周知更有避難外出事

後歸來者其數未能預定且小民凌見一聞官  
爲給產卽有業之家亦必諱有爲無希圖撥給  
縱使周查確實辦理公平而彼之舐望嫉爭事  
所不免惟有將此項查出田產分派公正道府  
勘明酌中定值逐一變價有承買者官給印照  
所收價值隨時總貯藩庫一面飭令被賊追賊  
各屬查明境內鄉勇若干難民若干除其中產

業素裕並鄉勇中首領人等曾家

恩賞給頂戴官職銀兩者毋庸再行給賞外其餘鄉  
勇難民仍照賑恤之例查其有業無業分別極  
貧次貧造冊通報由該管道府核明即將此項  
田產價值列等給賞以資生計並將辦理緣由  
及應賞姓名出榜曉諭如此通融酌辦庶無業  
之徒以及產少之家均得藉資生計而產業殷



裕者知有限制亦不妄生覬覦

吳熊光又奏言查前由巴東二塘垵竄入賊匪  
係龍紹周熊翠股內剽散零匪又有楊姓綽號  
楊大刀一夥零匪前來會合人數稍衆內查有  
劉姓綽號劉渣鬍子者爲首其中尙非盡屬鄉  
勇而曾爲鄉勇之人亦有附入賊夥者臣密詢  
都司麻光裕據稱前於歸州追賊時見賊隊內

有張么兒曾爲川東一路鄉勇臣查川省鄉勇

爲數較多從前賊股衆多時該鄉勇等利於剿  
賊搶奪騾馬衣物得售銀錢每遇接仗頗能首  
先衝擊茲當賊氛零落該勇等隨營剿賊既無  
所獲利又不敢向無賊處所肆意搶劫因而附  
入賊夥希冀搶掠實所不免今大兵未撤乘其  
附入賊夥一併剿除轉得免貽後患查楚省軍

營東三省馬隊官兵除

盛京官兵已節次遞撤回旗外現存吉林黑龍江  
兩省官兵四百餘員名統俟餘匪全行肅清再  
行分起凱撤均奏入

上命軍機大臣傳諭德楞泰曰此次各路鎮將等搜  
剿餘匪均有斬獲現在川境零匪統計共祇四五  
百人德楞泰當飭令鎮將等分投上緊殲捕務盡

根株至摺內所稱張績稟報有賊匪一起約五六百人由湖北巴東向邱家灣一帶有入川之勢等語此卽前次吳熊光所奏巴東二塘埡一起竄匪本日據吳熊光奏到該匪經孫應奉等帶領兵勇追擊該匪遂由羅坪等處狂奔出境等語楚省兵力較少此次鎮將內祇有孫應奉等帶兵追擊尙能將該匪轟逼出境可見該匪無他伎倆德楞泰

帶兵二千餘名是兵力幾三倍於賊無難尅日剿  
淨也至曾芝秀一犯聞其尙在奔竄該犯係著名  
首逆必當設法緝拏毋使漏網爲要再各路官兵  
此時搜剿餘匪或尙有需調派德楞泰當酌量留  
營不必速議撤回所有此次遇仗陣亡之遊擊馬

明德著咨部賜卹

上又命軍機大臣傳諭吳熊光曰此股賊匪旣經折

竄入川目下情形川東較楚省爲重但賊情詭詐  
百端楚省邊界地方尤須嚴密堵禦不可因賊匪  
旣去稍涉懈弛致該匪復有竄入情事此時孫應  
奉旣暫紮川界吳熊光當飭令該副將等小心截  
捕并查明境內有無零星匪竄匿一體搜捕至陳雲  
股匪經疊次剿殺之後剩有二百餘人尙在保康  
境內奔竄現經吉林泰呢瑪善跟蹤追捕復有慶

溥一路官兵與之合辦卽不能就地殲除亦必須  
逼剿出境以便川省官兵兜剿淨盡毋令闖入腹  
地爲要所有現在楚省吉林黑龍江兩省官兵四  
百餘員名著照吳熊光所奏暫行留楚統俟辦賊  
全竣後全隊凱旋不必零星遣歸也以另摺奏查  
辦附賊之鄉勇一事鄉勇撤退之後因而附入賊  
夥希冀劫掠未必僅張么兒一人伊等既經作賊

官兵於擊獲之後卽當照賊匪辦理亦不必因其  
會爲鄉勇加倍從嚴以致各鄉勇心懷疑懼轉滋  
反側又另據奏議辦楚省叛絕各產一摺此項叛  
絕田產散在各府多少不齊而鄉勇難民有業無  
業一時亦難查辦得實今吳熊光奏請將此項田  
產變價繳官將鄉勇難民等照賑卹之例分別賞  
給亦祇可如此辦理但勘估田產辦理給領等事



一切頭緒紛繁兼恐易滋弊竇必當遴派公正明白道府大員詳慎經理無濫無遺不可假手胥吏致啟弊端仍著將辦理章程先行具奏所有追賊陣亡之秦勇劉傑徐朝貴日正心劉起貴四名均著加恩照外委例賜卹

初八日

癸酉

額勒登保奏言竊

臣

據穆克登布呈

報都司李廷珍馬福全等在佛爺坪生擒賊匪

際萬書徐棟二名訊係姚陳二逆股內偽總兵  
與現在留營作眼之王泳清均皆認識情願領  
路同官兵搜擒宋逆李廷珍馬福全隨同守備  
馬忠良千總顧應全等分帶兵勇帶同王泳清  
陳萬書等作眼向萬山老林分路排搜穆克登  
布取路巫山亞前往策應李廷珍等搜至大塘  
口核桃灣一帶沿途殲斃賊匪一名生擒五名

訊稱宋逆尙有三十餘人向正北大壩老林竄去馬福全等卽向北跟搜於十七日辰刻在寨子山老林又獲賊匪四名並投出趙文科一名訊知宋逆卽在此一帶林內各官兵深入窮搜穆克登布並派馬兵在林外要路扼截探悉賊匪二十餘人於四更後自北面老林潛下在仙八灣老林邊草棚內屯聚各官兵於十八日黎明

明趕到有貴州額外外委朱文奉持矛首先衝入棚內戳斃一賊被旁賊矛傷肚腹陣亡各該匪見有兵來卽紛紛四竄一賊持矛奪路搶入老林經趙文科指認卽係宋應伏馬忠良顧應全率衆趕擒經陳萬書上前抱住該匪尙欲掙脫適軍功馮天堂新勇張廷榮趕到一同將該犯擒獲各路兵勇共擒活賊十九名殲斃三名

此起零匪已經淨盡查宋應伏係襄陽起事老  
教怙終不悛幸生就俘擒審明後卽行凌遲梟  
示其大寧太平山內奔竄之賊據田朝貴稟報  
叅將張明德遊擊薛陞王忠貴守備張應賜等  
在三溪子大黃溪等處分兵圍殺斃賊十一名  
生擒四十五名復經田朝貴親帶官兵由木盞  
垵截殺斃賊七名生擒十三名餘匪分匿林箐

均經張明德把總李必榮五品軍功羅子美帶  
兵搜獲訊係各股零匪冉添元之姪冉其才帶  
領該匪已臨陣殲斃田朝貴現由漆池河探剿

臣

又接興奎來信並漢中文武稟報前由南山  
竄入棧西海青溝之賊向黑河奔竄經道員朱  
爾漢等派令鄉勇堵截斃賊數名該匪卽由金  
池院南竄又經遊擊劉英魁等在安橋溝進擊

斃賊十二名與奎親率馬步官兵跟蹤追剿副將張廷楷叅將李應元帶兵由山內向南追來十七日該匪竄至鐵鎖關經與奎派出之把總李永和帶勇截擊殲斃賊匪二十餘名生擒四名該匪屯入卦子山晝夜奔逃已入廣南地界

臣現劄張廷楷李應元入川跟剿並札知與奎

督兵堵截臣刻卽督率副將王兆八夢等帶領官

兵由大竹河至太平西鄉聯界之漁渡壩居中  
督飭如大寧零匪折回西北臣可以迎頭扼截

卽西北新竄廣南之殘匪或經穆克登布達自

祥劉清張廷楷李應元剿急東竄臣亦可就近

赴簡池壩一帶迎擊至此次研訊宋應伏據供

襄陽河南老教賊首均已殲擒所指出之僞先

鋒總兵等數名亦皆陳賊內後續之犯是現在



實無緊要賊目合計臣等現辦之賊東面不過

五六百人此外惟與巴竄匪二三百名除此再

無另股指日可以辦竣又現據叅將常祿帶領

弁兵並總兵汪啟派弁將前此生擒之陳文海

王世吉等並姚馨佐首級解送臣營審訊陳文

海行抵西鄉因傷重身死隨與姚馨佐一併剉

屍梟示王世吉係屬投出又且引兵圍搜斬

首逆自當遞籍安插其餘陣獲各犯均卽正法  
所有鎗斃姚馨佐之寨民並在事兵丁等臣已  
酌賞銀四百兩其擒獲陳文海之兵丁並在事  
弁兵共分賞銀六百兩奏入

上命軍機大臣傳諭額勒登保曰此次穆克登布分  
派官兵扼截排搜將該逆宋應伏擒獲穆克登布  
著交部議敘貴州額外外委朱文奉首先衝入賊

棚戮斃一賊猝被矛傷陣亡殊爲可惜著咨部照  
把總例賜卹其率衆趕擒之守備馬忠良千總顧  
應全幫擒出力之把總孫漢馬兵謝敖并軍功憑  
天堂新勇張廷榮均用硃筆圈出已照額勒登保  
所請分別加恩惟閱摺內所敘各路搜捕情形祇  
稱與巴竄匪二三百名並未將巴東二塘垭一起  
竄匪敘及其賊數亦不符合前因吳熊光奏到業

已節次降旨諭令額勒登保速派得力大員帶兵  
赴楚協剿額勒登保此次發摺時自未接奉前旨  
想亦未接該處文武稟報現在二塘堖一起卽有  
四百餘人昨據德楞泰奏報此起又會合他股共  
有六七百人已竄至川東邊界當卽諭令就地兜  
剿額勒登保仍當遵照前旨卽派得力大員帶兵  
協捕此時川陝連界餘匪尙未能全數掃除額勒

登保自當在陝暫駐俟陝境肅清後仍當親統大  
兵將大股竄匪不拘何處督剿淨盡卽宋逆所供  
老教賊首均已殲盡之語亦未可盡信卽如曾芝  
秀卽在疑似之間似此者恐尙不免有遺漏總當  
飭令嚴密搜緝務絕根株至獲賊王世吉係自行  
投出又引兵擒斬姚陳二逆於訊供後免死遞籍  
並將殲擒出力之寨民兵丁等分別賞銀所辦俱

是再曾芝秀一犯聞其尚在奔竄該犯係著名首  
惡必當設法曬緝明正典刑額勒登保當飭知帶  
兵鎮將一體留心勿任漏網

十一日

丙子

勒保奏言

臣

昨移師東鄉途次開縣

接據東路文武稟報楚境前竄興歸一路之賊  
復從界嶺折轉竄入巫山奉節地方又有由房  
縣之陰條嶺竄來賊匪一起亦至巫山大寧交

界之八石坪一帶

臣

察核情形似楚省剿剩餘

匪盡行逼入川界當卽信商德楞泰旋准來信

德楞泰已飛調副都統色爾滾總兵馬瑜遊擊

楊森等馬步官兵歸集一路德楞泰親自帶回

東路相機兜截

臣

卽趕赴西路督催鎮將等將

太平山內苟朝九王國賢曾芝秀各股餘匪分

路掃除查太平沿邊山內零匪分起奔竄現經

田朝貴王兆夢楊森等連日搜剿又殲斃一百  
二三十人約計尙有五百餘人內苟朝九一起  
餘匪及陝省南山續竄出賊匪尙在太平山內  
約有二三百人田朝貴現在帶兵搜剿曾芝秀  
王國賢等股內各起剿散零匪約亦有二三百  
人現經叅將陳弼轟逼出山已竄至後河清化  
溪栢楊溪一帶分起奔逸適臣行抵東鄉地方



卽派令副將蕭鳳來叅將羅思舉都司周士貴  
等分帶兵勇由東鄉取道與陳弼分投搜捕以  
期迅速辦完至川東腹地州縣近日已經肅清

臣惟恐各路或有剿散零匪竄入因留叅將桂

涵一路兵勇往來巡緝茲據報稱探有零匪一  
起四十餘人由開縣山內竄出桂涵督率官兵  
前往迎剿殺賊五名生擒四十四名並無一名

漏網又探得扇子山有零匪一二十人潛匿當  
派千總李思貴分兵往捕搜獲十三名再據臬  
司劉清稟報接據陝西寧羌州報稱南山內有  
零匪一起一二百人假充官兵於十二日竄出  
棧道高橋舖有由沔縣奔鐵鎖關之勢劉清已  
帶鄉勇赴神宣驛一路相機防堵查寧羌沿邊  
一帶處處與廣元接壤現在川北旣已肅清又

有此起賊匪竄來臣現已飛飭羅聲舉率領兵

勇兼程馳赴廣元會同劉清防堵又據報通江

縣地方有零賊二十餘人由陝竄至經穆克登

布派兵追捕全數搜獲卽解穆克登布軍營查

訊辦理臣查此次楚省入川之賊由房縣陰條

嶺竄來者或報有二三百人或僅稱只有數十

人現在寄信豐紳查明剿辦其由興歸竄來者

報稱有六七百人<sub>臣</sub>已移師西路相距稍遠查  
訪未能甚確本日接德楞泰來信該匪因聞川  
省有兵迎擊卽由白水河折回東奔已離火峯  
界嶺不遠德楞泰現已星馳東向截剿如該匪  
仍回楚境德楞泰卽帶兵過楚辦理奏入

上命軍機大臣傳諭勒保曰勒保摺內所敘各路賊  
數仍未減少伊前次稱儘此二月內可以全境肅

清乃每閱旬餘遞到奏報雖均有斬獲而賊數依然如舊總未能將餘匪迅速洗蕩似此因循怠玩日復一日究於何日始能竣事卽云搜捕零匪係屬善後事宜亦豈有閱數月之久而搜捕尙未完竣之理此時春融氣和若不趁此將各路餘匪速行搜盡將來一交夏令雨水盛行路徑溽滑彼時深山老林尙有竄匿餘匪搜捕較難且麥收以後

賊匪又得恣掠口食苟延殘喘必致遲逾夏秋更復成河事體朕縱不立限嚴催勒保亦當上緊設法務飭鎮將等奮力搜擒將各路竄匪及早辦淨用葺全功毋得再有稽滯再于國賢一犯本年正月內據德楞額奏勒保先後奏稱該犯於上年十二月內在雲陽縣投首實係正身其應如何安置之處勒保俟提到審明後再行核辦等語彼時伊等

招內敘稱王國賢餘匪尙在奔竄當經降旨以王國賢旣已投出伊身係頭目何不卽令招徠同夥賊黨更可踴躍出投想勒保等自早經接奉此旨乃兩月以來勒保屢次奏報總未據將訊明王國賢口供如何安置及奉旨後曾否令王國賢招撫同夥之處續行奏聞卽此可見漠不關心不以國事爲念其張長青一犯勒保等曾否令其招撫同

駭著有成效現在遞籍安插之後能否安靜俱著  
查明奏聞此外如曾芝秀齊國典荷朝九等犯皆  
係賊中緊要頭目是否尙在川省竄匿勒保皆應  
設法躡緝或向獲犯及投出賊夥內詳悉跟訊自  
無難得其下落務須擒獲殲斃不可任令漏網

十三日

戊寅

額勒登保奏言竊

臣

准興奎信稱南

山竄匪自卦子山被剿後連夜南通深入南江



地界又據穆克登布呈報麻柳灣地方有零匪藏匿搜獲六名殲斃二名還有十餘名在冬處

老林潛匿

臣

當飭穆克登布極力搜巡總期淨

絕根株又據楊遇春呈報探悉零匪百餘人在閃電溪老林潛匿隨派副將張瑗都司余步雲帶兵截剿分投進發余步雲一路斃賊五名生擒三名張瑗一路斃賊六名該匪見兩路兵來

卽翻山南竄路通桐油壩湯家壩一帶現仍跟

蹤截剿等情

臣

查此股卽係去冬由七星壩南

竄之匪現有豐紳所派官兵在彼探剿已飭楊

遇春分派將領趕緊剿洗再

臣

接據各地方官

稟報二月十五日有匪徒一起突至山陽縣屬

東面之竹林關聚集乘夜焚掠傷人奔竄檀溪

等情

臣

查該處毗連楚豫設有鴟張所關非細

臣

一面飛探情形一面挑調弁兵於興安預備  
茲於初三日據臬司文需稟報該匪徒等於二  
十三日經署商州知州宋昌琿督率義首李維  
翰帶領寨勇圍捕鎗斃四十餘名被脅之人均  
經逃散祇餘三十餘名向山陽縣之高壩店奔  
竄又經山陽縣知縣典常帶同典史馮日照督  
率迎截殺斃五名生擒張東春等十一名所剩

餘匪卽可全數撲滅等情臣查該匪只剩十餘

人自無難卽時盡絕臣已劄令文需嚴密督飭

務將逸犯全數弋獲毋任漏網並審明該匪等  
起彙根由人數實有若干查明被焚房屋殺傷  
人口酌予卹賞妥爲辦理

額勒登保又奏言臣於初一日接准吳熊光來

信云二塘埡一股鼠匪經總兵李天林迎擊殲

除數十人官兵亦有傷損餘匪約五百人向興  
歸巴東老林奔竄等語頃於初二日又接德楞  
泰來信賊匪四五百人大半皆係官兵打扮並  
有馬騾三四十匹十八日已至奉節之草堂河  
屯紮等語德楞泰現已帶領官兵向東抄剿邇  
日或已得有勝仗但此股竄匪是否實係鄉勇  
滋事抑係山中伏匪聚零匪歸巴一帶相距

臣  
一千四五百里之遙此時實難確指至陝界

防堵各提鎮均有分段防剿之責在在緊要勢

難抽撥臣軍營祇有副將王兆夢唐文淑二員

兵一千二三百名官兵亦無可多撥臣現卽向

東進發設賊勢鴟張臣卽親督官兵入楚與德

楞泰夾擊掃除不敢稍有疎懈均奏入

上命軍機大臣傳諭額勒登保曰額勒登保奏陝省

邊界餘匪據各路鎮將稟報督率官兵痛加追剿  
沿邊俱有斬獲剩無幾所辦尙好至二塘埡一  
起竄匪約有四五百人前此德楞泰奏報此起又  
會合他股共有六七百人不止四五百人之數此  
股逆匪節據吳熊光查係川東剿散零匪冒充鄉  
勇希圖劫掠並非川省鄉勇等乘機作亂看來該  
匪等湊聚餘黨輾轉奔竄仍係山中伏匿未經搜

淨之賊現在官兵疊加截擊已竄回川東前曾諭  
令額勒登保卽派得力大員帶兵協捕茲據奏稱  
陝界防堵各提鎮均有分設防剿之責勢難抽撥  
赴楚自係實在情形二塘埡股匪總在川楚交界  
地方此時德楞泰業已統領大兵自西而東相機  
兜剿其川陝連界餘匪尙未全數辦淨額勒登保  
自應仍駐陝界督剿南江一帶竄匪無庸親自移



師入楚至目下大功雖已告歲而大兵仍未可驟  
議全撤倘撤兵之役猝有滋事匪黨又須派兵緝  
捕成何事體卽將來剿捕餘匪已淨亦不妨多留  
數月半載俟地方實在寧謐人心鎮定再行議撤  
亦未爲遲也

十五日

庚辰

德楞泰奏言竊

臣

在巫山途次探報

賊匪竄至巴東有走棟家坡馬寨東奔之勢查

陳家坡馬寨等處東走係平陽壩饒鈹頂與歸  
州連界向北係老山內之鋸鋸嶺長峯堆子等  
處隨飛管副都統銜都當阿副將孫應奉等帶  
兵在於平陽壩饒鈹頂一帶先扼其東竄之路  
因查巫山之八石坪路通房縣之陰條嶺大九  
湖小九湖紅巖一帶老山可以繞至巴東北面  
之長峯堆子等處雖林箐深密道路艱險稍爲

修開馬騾尙可行走且可搜捕楚境山內餘孽  
當卽改道前進現在劉渣勣子等夥聚之賊探  
有七百餘人竄相思嶺烏雲頂等處仍係川楚  
交界老山緣前月二十八日起至今霖雨未止  
山中積雪未消道路險窄滑濘若大兵一路尾  
追前進設或旁竄東回或又北避勢所必有是  
以臣酌派藍翎千總周應龍冉玉龍及新勇軍

功等選出各營精壯兵勇二百名帶同屢次投  
出効力新勇數十名或藍白布包頭或草帽毡  
帽扮作教匪給與執照令其由相思嶺水洞坪  
尾躡或與賊匪合夥俟官兵抄截時卽爲內應  
或乘夜潛襲痛剿或多燒號火遙爲大兵追剿  
之勢總以過其東折爲要相機而行仍令逐日  
專差一人遞報賊情

臣

督兵取道龍洞河崖屋

學古三才山石新編卷一  
三言  
坪自東北向西旁抄如截逼回川深入雲開山  
外一帶稍得地勢不過一戰再戰當可掃除秦  
入

上命軍機大臣傳諭德楞泰曰劉渣鬍子一起竄匪  
前經屢降諭旨令德楞泰帶兵督辦今閱摺內所  
敘情節祇係探明該逆蹤跡設法抄擊尙未與賊  
接仗轉瞬卽交夏令又復藉詞暑雨載途難於搜

剿而麥收以後賊匪又得到處掠食苟延殘喘勢必別滋裹脅聚而益多更復成何事體況此時烏合竄匪原無著名首惡但亦必有起意糾聚之人在內爲首設稍予以暇則匪黨漸多積久又成著名賊首卽如此次吳熊光奏到該匪等在二塘坵滋事以來已閱兩旬官兵尙在部署進剿而賊匪內已有劉渣鬍子楊大刀等爲首名目現又不知

裘脅幾何是以德楞泰前奏稱此起賊匪共五百餘人本日摺內已稱有七百餘人可見賊數業已增多尙恐所報未必盡實不止此數現在各路零匪以此起賊數爲最多德楞泰布置停當親身帶兵迅速抄擊趕緊剿盡不可專委之鎮將分投殲捕致有遲滯如劉渣鬍子一起辦淨後卽用六百里馳奏以慰廑懷彼時德楞泰相度事機或再整

同額勒登保勒保將川東各路零匪搜捕淨盡此  
時距夏令尙一月有餘德楞泰務當加倍出力儘  
於三月內將此起及各路零匪一律搜淨無遺勿  
稍鬆懈爲要至相思嶺烏雲頂等處爲賊匪往來  
奔竄之路德楞泰選出各營精壯兵勇改裝扮作  
教匪前往探聽賊情相機內應所見亦是再摺內  
稱現督兵勇取道龍洞河將該匪等由東北一帶



截逼回川不過一戰再戰當可掃除等語果能於  
一兩仗內迅速集事因所深願德楞泰惟當勉益  
加勉勿徒以空言鋪敘